

- राज्यसभा रा सभापति अर उप राष्ट्रपति एम वेंकैया नायडू प्रधान न्यायाधीश दीपक मिश्रा रा खिलाफ महाभियोग रो नोटिस खारिज कीनो।
- मुख्यमंत्री वसुंधरा राजे आज पाली जिला मांय केई कार्यक्रमं मांय शिरकत कीनी- फालना मांय जनता सागै बातचीत कीनी।
- केन्द्रीय पर्यटन राज्य मंत्री के जे अल्फोंस कह्यो- राजस्थान मांय पर्यटन रा विकास री घणी संभावना।
- राज्य मांय मिशन इंद्रधनुष कार्यक्रम रा तैत टीका लगावण ऊं बचा बच्चां अर उम्मीद वाळी लुगाइयां नै टीका लगाया ज्या।

000

राज्यसभा रा सभापति एम वेंकैया नायडू भारत रा प्रधान न्यायाधीश दीपक मिश्रा रै खिलाफ महाअभियोग लगावण सारु विपक्षी पार्टियां कानी ऊं दियो ज्यो नोटिस आज खारिज कर दीनो। श्री नायडू विपक्षी पार्टियां कानी ऊं दिया ज्या नोटिस नै ठोस आधार री कमी रो हवालो देता थकां खारिज कर दीनो। सभापति कानून अर संविधान रा जाण्या-माण्या जाणकारां सागै सलाह पाछै ई नोटिस नै खारिज करण रा 22 कारण बताया। कांग्रेस समेत विपक्ष री सात पार्टियां प्रधान न्यायाधीश रै खिलाफ कदाचार रा पांच कारणां माथै आधारित महाअभियोग नोटिस राज्यसभा रा सभापति एम वेंकैया नायडू नै दियो ज्यो हो। ध्यानजोग है कै किण ई मौजूदा मुख्य न्यायाधीश रै खिलाफ पैली दफा महाअभियोग रो नोटिस दियो ज्यो हो।

000

मुख्यमंत्री वसुंधरा राजे पाली जिला रा तीन दिन रा दौरा रा तैत आज फालना पधार्या। मुख्यमंत्री फालना मांय जनता सागै बातचीत कीनी। श्रीमती राजे वठै न्यारा न्यारा महकमा कानी ऊं लगाया ज्या काउन्टर देख्या। वै दो अन्नपूर्णा मोबाइल वैन री सरुआत ई कीनी।

000

सडक परिवहन अर राजमार्ग मंत्री नितिन गडकरी कह्यो है कै सरकार हादसां मांय मौतां कम करण सारु सगळा जरुरी जतन कर रही है। वै आज नुवी दिल्ली मांय 29वां सडक सुरक्षा सप्ताह रा उद्घाटन जळसा मांय बोल रह्या हा। श्री गडकरी कह्यो कै देश मांय हर साल कोई पांच लाख हादसा व्हे है ज्यां मांय कोई डोढ लाख जणां री मौत व्हे जावे है। वै सडक हादसां माथै चिंता जताता थकां कह्यो कै सरकार आं री रोकथाम सारु लगातार कोशिश कर रही है।

राज्य मांय ई आज सरु व्ह्या सडक सुरक्षा सप्ताह रा तैत केई कार्यक्रम राख्या ज्या। अजमेर, झालावाड अर उदयपुर मांय आज परिवहन महकमा कानी ऊं वाहन रैली निकाळी ज्यी। जालौर, बाडमेर अर भीलवाडा मांय फोटो प्रदर्शनी लगाई ज्यी। उदयपुर मांय सांसद अर्जुन लाल मीणा प्रदर्शनी रो उद्घाटन कीनो। नागौर मांय परिवहन महकमा कानी ऊं जागरुकता रैली निकाळी ज्यी। प्रतापगढ मांय वाहन चलावण वाळां नै गुलाब रा फूल दे र यातायात नियमां री पालना करण री अरज करीज्यी।

000

प्रदेश मांय रोडवेज री बसां मांय सफर करण वाळा 80 साल ऊं बत्ती उमर रा बुजुर्गा नै मुफ्त यात्रा रो सुबीतो मिलेला। ई रै अलावा वां रै सागै एक मददगार नै किराया मांय आधी छूट मिलेला। ई सारु निगम स्मार्टकार्ड बणावैला ज्यी बाबत सगळा डिपो अर खास बस स्टैण्ड माथै व्यवस्था करी ज्यी है।

000

शिक्षा राज्यमंत्री वासुदेव देवनानी आज भीलवाडा मांय केन्द्रीयकृत रसोई री सरुआत कीनी। ई मौके वे कह्यो कै सरकार मिड-डे-मील मुहैया करा र स्कूली विद्यार्थियां नै चोखो खाणो देवण री कोशिश कर रही है।

000

प्रधानमंत्री नरेन्द्र मोदी 29 अप्रैल नै आकाशवाणी ऊं प्रसारित व्हेवण वाळा मन की बात कार्यक्रम मांय वां रा विचार बतावेला। आप ई आपरा विचार अर राय नरेन्द्र मोदी एप या माई जीओवी ओपन फोरम माथै भेज सको हो।

000

केन्द्रीय पर्यटन राज्य मंत्री के.जे. अल्फोंस कह्यो कै सरकार आवता तीन साल मांय देश मांय घूमणियां री तादाद दूणी करण सारू सगळा जतन कर रही है। वै आज जयपुर मांय राज्य सरकार अर फिक्की कानी ऊं राख्यी ज्यी ग्रेट इंडियन ट्रेवल बाजार री प्रदर्शनी रा उद्घाटन जळसा मांय बोल रह्या हा। वै कह्यो कै राजस्थान मांय पर्यटन विकास री घणी संभावना है। वै बतायो कै भारत मांय लारला साल परदेशी घूमणियां री तादाद 15 दशमलव 6 फीसदी बधी ही अर आं ऊं व्हेवण वाळी आमदनी मांय कोई 20 फीसदी रो इजाफो व्हयो हो।

000

प्रदेश कांग्रेस कानी ऊं आज कोटा मांय संभाग स्तर रो सम्मेलन राख्यो ज्यो। सम्मेलन मांय पार्टी रा राष्ट्रीय महासचिव अविनाश पांडे, प्रदेश कांग्रेस अध्यक्ष सचिन पायलट अर विधानसभा मांय विपख रा नेता रामेश्वर डूडी समेत पार्टी रा केई नेता शिरकत कीनी।

000

राज्य मांय केई ठोडां मिशन इंद्रधनुष कार्यक्रम रा तैत आज टीका लगावण रा खास आयोजन कर्या ज्या। सर्वाईमाधोपुर जिला रा 26 गांवां मांय टीका लगावण रो अभियान सारू कर्यो ज्यो। झालावाड जिला रा तीन गांवां मांय ई रा तैत खास कार्यक्रम राख्या ज्या। नागौर जिला रा 24 गांवां मांय कोई 200 बच्चा रै पोलियो, टीबी अर पीलिया समेत केई बीमारियां ऊं बचाव रा टीका लगाया ज्या। अभियान रा आगलो दौर 20 अर 21 मई नै चलायो जावैला।

000

राष्ट्रीय कृमि मुक्ति अभियान रा चोखा नतीजा सामी आया है। स्वास्थ्य सचिव अर मिशन निदेशक नवीन जैन बतायो कै ई रा तैत 2 करोड़ ऊं बत्ता टाबर टाबरियां नै कृमि निरोधी दवा दीरीजी।

000

केन्द्रीय सूचना अर प्रसारण राज्यमंत्री कर्नल राज्यवर्द्धन सिंह राठौड गांव वाळा ऊं सफाई माथै खास ध्यान देवण री अरज कीनी है। जयपुर ऊं दिल्ली जाती बगत कर्नल राठौड चन्दवाजी गांव मांय अहलकारां ऊं सफाई रा बारा मांय जाणकारी लीनी। वै भैंसलाना गांव रै डिजिटल बणबा माथै गांव वाळा नै बधाई ई दीनी। वै गांव री वेबसाईट सारू करण माथै ई राजीपो जतायो।

000

कोटा री एक अदालत इनकम टैक्स महकमा रा दफतर ऊं सवा दो करोड़ रुपया मोल रा सोना रा गहणा चोरी करण रा आरोप मांय तीन जणां नै दो दिन री पुलिस रिमाण्ड माथै भेज दीना। ध्यानजोग है कै थावर री रात कोटा रा इनकम टैक्स दफतर ऊं अ लोग जेवरात भर्या दो थैला चोर लीना हा।

000

केन्द्रीय माध्यमिक शिक्षा बोर्ड—सीबीएसई नौवीं ऊं बारहवीं कक्षा तांई रा विद्यार्थियां सारू रोजीना एक घंटा री खेल—कूद री कक्षा लगावणी जरुरी कर दीना है। ई सारू ग्रेड दी जावैला अर मैट्रिक अर बारहवीं री बोर्ड परीक्षा मांय शामिल व्हेवण सारू जरुरी व्हेला।

000

अर अबै जिलां ऊं मिल्या समाचार :-

- ❖ चित्तौड़गढ़ रा स्थापना दिवस रै मौके आज केई कार्यक्रम राख्या ज्या।
- ❖ श्रीगंगानगर रो अतिरिक्त सत्र न्यायालय हित्या रा आरोप मांय एक जणा नै उम्र कैद री सजा सुणाई।
- ❖ उदयपुर जिला रा जयसमंद अभयारण्य मांय लागी लाय माथै जंगलात महकमा रा कर्मचारी काबू कर लीना है।
- ❖ भरतपुर मांय लारला दिनां व्ही लूट अर डकैती री वारदात मांय भेळा पांच आरोपिता नै पुलिस गिरफ्तार कर लीना है।
- ❖ चूरू मांय पुलिस आईपीएल मैच माथै सट्टो लगाता थकां दो जणां नै गिरफ्तार कीना।

- ❖ भीलवाड़ा जिला रा बागौर पुलिस थाणा री हिरासत ऊं फरार व्ह्या डोडा चूरा तस्करी रा आरोपित नै पुलिस कोटा ऊं गिरफ्तार कर लीनो। ई मामला मांय थाणेदार नै लाइन हाजिर अर संतरी नै मुअत्तल कर दियो ज्यो हो।

000